

## P E D D E M A L A

Biu de ojes e lestru 'e manu;  
temperamentu de caddu fogosu;  
ignorante, rempellu e puzzinosu;  
anima malaitta in corpus sanu.

Truvende unu masonu in Mont'Entosu,  
l'han duos costerinos affrontadu,  
propriu s'annu chi s'est fattu isposu.

In mudandas de linu ch'hat mandadu  
unu zertu mercante, in die 'e frittù,  
pustis de l'haer de totu ispozadu.

Timid'e supportadu in dogni situ,  
sempre campend'e su suore anzenu,  
d'esser grande ladrone hat su meritu.

De sa notte non timet su serenu  
né tronos de tempestas e nennancu  
de sa legge cunsiderat su frenu.

De sos reos sexidù est in su bancu  
pius de una 'olta e in galera  
ch'hat pasadu culatiga e fiancu.

Connoschet cantu est manna Sa Costera,  
sos saltos de Osidda e de Nuoro,  
ca b'hat amigos de'...cudda manera.

Preferit su 'eranu in Logudoro;  
in sos istios l'aggradat s'altura,  
sa Nurra de jerru intro su coro.

Ca 'ona li essesit congiuntura,  
che truvesit in montes de Nughedu  
masonu e caddu masciu a sa pastura.

Miraculu chi solu in su...buschedu  
podet suzeder chi da-e s'intragna  
de unu caddu masciu nascat fedu,

Peddemala lassesit sa montagna  
cun su masonu sou e cun s'acchettu  
cun d'un'...anniju fattu in sa campagna.

Pro male non l'hat fattu o pro dispettu,  
chi anzis - pro sa santa veridade -  
trattesit in cussolza cun...rispettu.

Ma sa legge, l'ischimos, piedade  
non podet haer pro sos bardaneris  
chi non rispettan sa proprietade:

su marisciallu 'e sos carabinieri  
che li colpat in domo a notte manna:  
-S'in nomen de su re non mi l'abberis,

mi l'abbels'eo cun forza sa gianna -  
li narat; e issu, a rassu a rassu,  
cun forza cantu haiat in sa canna,

rispondet: -. . . pro su re bi ponzo s'assu. . .  
E cunvintu chi 'ennida fit s'ora  
de l'accordare a sa legge su passu,

torreat a presone e. . . b'est ancora.

Alghero, li 24 Agosto 1957

Forico PITZOLU  
de Bolotana

*Forico Pitzolu*

Maresc. Magg. CC.  
in licenza a  
-Via S. Bonaventura II-

N U L V I  
(SS.)